

Radio tv-lu pillugit aalajangiisartut suleriaasissaat pillugu Namminersornerullutik Oqartussat nalunaarutaat

Radiukkut tv-kkullu aallakaatitsisarneq pillugu Inatsisartut peqqussutaanni nr. 6, 14. november 2004-meersumi § 43, imm. 4 aamma § 49 naapertorlugit aalajangersarneqarput:

Radio tv-lu pillugit aalajangiisartut ataatsimiittarneri il.il.

§ 1. Aalajangiisartut ukiumut pingasoriarlutik-sisamariarlutik ileqquumumik ataatsimiittassapput ullunik ataatsimik-marlunnik sivilussuseqarsinnaasunik.

Imm. 2. Aalajangiisartut siulittaasuat, aalajangiisartut ataatsimiinnissaat kingusinnerpaamik sapaatip akunnerinik marlunnik sioqqullugu ataatsimiinnissamut aggersaasarluilu ataatsimiinnermi atortussanik nassitsisassaaq.

Imm. 3. Aalajangiisartut siulittaasuat aalajangiisartut sulinerannik aaqquissuussillunilu aalajangiisartut ataatsimiinnerini isumaqatiginninniarnernik siulersuisuussaaq. Siulittaasoq ataatsimiinnernut piffissamik sumilu ataatsimiittoqarnissaanik aalajangiisassaaq, aalajangiisartullu suliaasa naapertuuttumik pilertussusillimmik suliarineqarnissaat nakkutigissallugu.

§ 2. Ilaasortat pingasut tamarmik peqataanerini Radio tv-lu pillugit aalajangiisartut aalajangiisinnaassuseqarput, taamaattorli tak. §§-it 2 aamma 8, imm. 2. Aalajangiinerit nalinginnaasumik amerlanerussuteqarnikkut pisassapput. Taasinerni amerlaqatigiittoqartillugu siulittaasup taasinera aalajangiisuussaaq.

Imm. 2. Suliani kinguartinneqarsinnaanngitsuni aalajangiisoqassatillugu, aalajangiisartuni ilaasortat sinnerinik ataatsimiigiaqqusinnissaq periarfissaqanngippat siulittaasoq aalajangiisartut sinnerlugit aalajangiisinnavaoq.

§ 3. Ilaasortap suliassamut suliarineqartussamut attuumassuteqarnini pissutigalugu peqataasinnaannginnera aalajangiisartut aalajangiuppasuk, suliassaq ilaasortat sinnerinit suliarineqassaaq.

§ 4. Aalajangiisartut isumaqatiginninniarneri aalajangiinerilu imaqarniliorneqartassapput. Imaqarniliorneqartassaaq aalajangiisartut siulittaasuata nakkutigissavaa.

Imm. 2. Ilaasortap aalajangiinerimi isumaqataanngitsup isummami imaqarniliami ilanngunneqarnissaa piumasarisinnaavaa. Ilaasortaq aalajangiinerimi isumaqataanngippat tamanna aalajangikkami takuneqarsinnaassaaq.

Imm. 3. Allattoqarfup imaqarniliap assilinera, aalajangiisartut tullianik ataatsimiinnissaannut aggersaannermut ilutigitillugu ilaasortanut nassutissavaa. Imaqarniliap imarisai ataatsimiinnermi tassani akertilerneqanngippata tamanna akuerineqartutut isigineqassaaq.

§ 5. Radio tv-lu pillugit aalajangiisartuni ilaasortaq ataaseq aalajangiisartullu allattaat ukiumut ataasiarlutik-marloriarlutik Kalaallit Nunaata Radioanut (KNR-imut) aamma aallakaatitsisinaanermut akuersisummik piginnittunut nakkutilliiartortassapput.

Imm. 2. Aalajangiisartut pissutsit immikkut ittut atuutsillugit aalajangersinnaapput nakkutilliiartornissaq pillugu siumut nalunaaruteqassallutik.

Imm. 3. Aalajangiisartut nakkutilliiartornerminni aallakaatitsisinaanermut akuersisummik piginnittut paasissutissanik sunilluunniit, aalajangiisartut suliassaannut pingaaruteqartunik piumasaqarfigisinnaavaat.

§ 6. Aalajangiisartuni ilaasortat, allattoqarfik kiisalu ikiuuttartuusinnaasut suliassat suliarineqartarnerat pillugu inatsisip tamanna pillugu maleruagassartai naapertorlugit nipangiuussisussaataapput.

§ 7. Radio tv-lu pillugit aalajangiisartut allattoqarnissaat Kultureqarnermut Pisortaqaqrfiup isumagissavaa.

Imm. 2. Allattoqarfik suliassanik, radiukkut tv-kkullu aallakaatitsisarneq pillugu Inatsisartut peqqussutaanni aalajangersarneqarsimasunik piareersaasarnermigut aalajangiisartullu aalajangiussaannik malitseqartitsisarnermigut aalajangiisartut ataatsimiinnissaannik piareersaaqataasarlunilu ingerlatseqataasassaaq.

Imm. 3. Allattoqarfiup suliassanut imm. 2-mi taaneqartunut tunngatillugu isumagissavaa oqaluuserisassat, suliassanik aamma allattoqarfiup taakku pillugit allattugaataanik ilallugit nassiunnissaat.

§ 8. Suliassat immikkut suliassartaqanngitsut allakkatigut suliarineqarsinnaanerat siulittaasup aalajangersinnaavaa.

Radio tv-lu pillugit aalajangiisartut suliassat

§ 9. Sumiiffigisami tv-qarfiit aallakaatitassiornissaannut tapiissutit, radiukkut tv-kkullu aallakaatitsisarneq pillugu Inatsisartut peqqussutaanni taaneqartut Radio tv-lu pillugit aalajangiisartunit aqunneqarlutillu agguanneqartassapput, tak. sumiiffigisami radioqarfinnut tv-qarfinnullu il.il. tapiissutit pillugit nalunaarut.

Imm. 2. Tapiissutit imm. 1-mi taaneqartut, tapiissutit pillugit maleruagassanut naapertuutinnigitsumik atorineqarsimanerat aalajangiisartunit paasineqarpat, aningaasat akuersissutigineqarsimasut tamakkiisumik ilaannakuusumilluunniit utertinneqarnissaat piumasarineqarsinnaavoq.

Imm. 3. Aalajangiisartut imm. 1 naapertorlugu aalajangiineri allaffeqarfitsigut oqartussaasunut allanut naammagittaalliuutigineqarsinnaanngillat.

§ 10. Radio tv-lu pillugit aalajangiisartut sumiiffigisami aallakaatitsisinaanermut akuersissuteqarnissamik aalajangiisartuupput.

Imm. 2. Radio tv-lu pillugit aalajangiisartut radiumi tv-milu pilerisaarutit aallakaatitassianillu aningaasalersuisarnerit pillugit maleruagassanik unioqqutitsinermik aalajangiisartuupput.

Imm. 3. Radio tv-lu pillugit aalajangiisartut nuna tamakkerlugu aallakaatitsisinaanermut akuersissutip atorunnaarsikkallarnejarnissaanik atorunnaarsivinneqarnissaanilluunniit Naalakkersuisunut inassuteqartartuupput.

§ 11. Misissuisitsarnissat radiukkut tv-kkullu aallakaatitsisarneq pillugu Inatsisartut peqqussutaanni taaneqartut akulikissusissaat aalajangiisartunit aalajangerneqartassaaq. Misissuinerit radioqarfinnit tv-qarfinnillu ingerlanneqarsinnaanngillat.

§ 12. KNR-ip innuttaasunik kiffartuussinermut isumaqatigiissutip eqquutsinneqarnera pillugu ukiumoortumik nassuiaataa Radio tv-lu pillugit aalajangiisartut misissuataartassavaat, nassuiaatillu

aalajangiisartunit tiguneqarneraniit kingusinnerpaamik sapaatip akunnerisa arfinillit qaangiunneranni Naalakkersuisunut tamanna pillugu oqaaseqaasiortassallutik.

§ 13. Aalajangiisartut ukiut aningaasanut inatsiseqarfiusut naaneri tamaasa, aalajangiisartut ukiumi qaangiuttumi sulisimanerat pillugu nalunaarummik suliaqartassapput. Nalunaarut kultureqarnermut pisortaqarfimmut nassiunneqartassaaq.

Imm. 2. Nalunaarutip ilaatigut imarissavaa aalajangiisartut ukiumi qaangiuttumi suliarisimasaasa allattorsimaffiat. Suliassat suuneri pillugit paasissutissat, suliassat suliarineqarsimasut amerlassusiat kiisalu tunngavissatut aalajangiinerit pillugit imaqniliat allattorsimaffimmi ilaatinneqassapput.

Suliassat il.il. tunniunneqartarneri suliarineqartarnerilu

§ 14. Qinnuteqaatit, naammagittaalliutit kiisalu siunnersoqqulluni qinnuteqaatit il.il. uunga nassiunneqartassapput: Radio tv-lu pillugit aalajangiisartut, Postboks 1029, 3900 Nuuk.

§ 15. Qinnuteqaatit naammagittaalliutillu tunngavissaqarsorinanngitsut Radio tv-lu pillugit aalajangiisartunit itigartitsissutigineqarsinnaapput.

§ 16. KNR-ip akuersissutilluunniit piginnittuata pineqartup aallakaatitat, pilerisaarutit il.il. suliassamut tunngassuteqartut immiunneqarnerinik, piffissap aalajangiisartunit aalajangerneqarsimasup iluani aalajangiisartunut atugassiissuteqarnissaa imaluunniit nassiussinissaa Radio tv-lu pillugit aalajangiisartut pisariaqarsorigunikke piumasarisinnaavaat.

Imm. 2. Radio tv-lu pillugit aalajangiisartut, KNR-ip akuersissutilluunniit piginnittuata pineqartup sinniisui aamma aalajangiisartunut suliakkiuteqartoq erseqqinnerusumik nassuiaanissaat siunertaralugu aalajangiisartunut ataatsimiigiaqqullugit kajumissaarsinnaavaat.

§ 17. Radio tv-lu pillugit aalajangiisartut aalajangiinissaat sioqqullugu KNR, akuersissutip piginnittua pineqartoq imaluunniit aalajangiisartunut suliakkiuteqartoq paasissutissanik pigineqartunik ilisimasaqalernissamut aammalu suliamut tunngatillugu oqaaseqarnissamut periarfissaqartinneqassapput.

Imm. 2. Radio tv-lu pillugit aalajangiisartut piffissaliussamik akissutip nassiunneqarsimaffissaanik, nalinginnaasumik ullunit 14-init sivikinnerusinnaanngitsumik aalajangiissapput.

Imm. 3. Aalajangiinerit tunngavilersuutitaqartassapput.

§ 18. Aalajangiinerit tigusissusamut piaarnerpaamik ilisimatitsissutigineqartarnissaat aamma tunngavissatut aalajangiinerit tamanut saqqummiunneqartarnissaat Radio tv-lu pillugit aalajangiisartut isumagisassavaat.

Atortuulerfia

§ 19. Nalunaarut una ulloq 1. marts 2005-imi atortuulerpoq.

Imm. 2. Naammagittaalliutit Radio tv-lu pillugit naammagittaalliuteqartarfimmut ulloq 1. januar 2005 nallertinnagu anngunneqartut Radio tv-lu pillugit naammagittaalliuteqartarfiup, radiukkut fjernsynikkullu aallakaatitsisarneq pillugu Inatsisartut peqqussutaanni nr. 3, 17. maj 1990-imeersumi maleruagassat aammalu maleruagassat Inatsisartut peqqussutaat taanna naapertorlugu aalajangersarneqartut malillugit inaarlugit naammassissavai, tak. radiukkut tv-kkullu aallakaatitsisarneq pillugu Inatsisartut peqqussutaat.

Namminersornerullutik Oqartussat, ulloq 7. marts 2005

Henriette Rasmussen

/

Lise Lennert Olsen

Namminersorlutik Oqartussat

Imaneq 4

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut